

嘉靖南宮縣志

嘉靖南宮縣志

吳閩生題



南宮邢氏求已
齋依明本景印

叙志

予始爲南宮令下車數月諮諏令典率由前政縣中職掌先古及今損益事情碩人遺跡概亡所攷故老爲予言縣最晚著自唐虞三代爲冀州之域至成王封叔虞爲唐侯後改爲晉趙分晉爲趙秦平趙爲鉅鹿郡當其時賢人君子雖迭出其間而邑故無名類不可得而譜漢興始置爲南宮縣沿及魏晉惠帝之後其地淪沒於劉元海石勒符堅

叙志

已爲慕容垂所轄唐蒙隋業迨石晉棄幽燕宋不能復建炎初金人據兩河宋遂南渡者髦抱卷帙并遜江左陵遲至於勝國數百餘年洪武時全趙之地彌望草棘蔚爲茂林麋鹿游矣永樂後居民漸次開辟葺理墻屋村落煙井蕭條如故即斷碑殘碣無一存者安望其所爲志乎嗟乎邑無志以紀載前聞後將何鏡焉此有司之過也漢成帝時劉向言郡國地分張禹令朱贛條其風俗爲地理

志無有專書東漢南陽撰風俗志齊是郡縣始各自爲志其列國之有史官之義乎予諦觀兩漢以下諸書宮之文獻僅記什一於千伯郡州志已科條之矣蒐剔其軼亦無有見於他說闕如也深爲是懼廼以志屬之微山劉子摠其事選髦士開場等十人相助討論旁羅往牒累集成編志之大凡燦然備具予因撮其要實去其煩重疑者廢不傳間亦竊附己意竊有發明潤色辭文勒成一家而

宮邑之故亦畧可睹矣至於今昔理亂之原興壞之端戶口之登耗財賦之贏縮謹俗之推移人物之燾慝本始察終見盛觀衰以生養節愛率德厲化揚摧文教啓沾方來固鞠躬君子之所有事也予不嫌於不文自解退食之暇憇爲撰次以俟同志意在斯乎意在斯乎

大明嘉靖己未歲八月朔南宮縣知縣葉恒嵩書

南宮縣志序



南宮畿輔重地也乃故弗志葉公爲邑始志焉葉公蒞南宮三載矣精明易簡文以儒雅拯偏釐弊興廢舉遺南宮燁然一新也乃披獵載籍研涉經史察之乎風謠諮之乎父老又廣採諸荒壠野蹟殘碑斷石之中絜要領正名實大觀縣斷未半歲而數百年之曠典成焉乃以示劉子曰志南宮事也子南宮產也盍爲予序諸劉子三復之曰覈而

志序

文辨而不詭閑肆而能經允矣乎傳信之書也而公之學與政足觀矣夫學弗足以究天人之撰達康乂之猷屑屑焉侈口耳競締繪支離靡縵末裨世道者學之弊也政弗足以軌物貞教昭示久遠汲汲焉沾小惠徼速效譖衆眩上以趨功名者政之蠹也今觀葉公之治矣儉素是敦廉介自砥周悉勤恪與四境休息日具弗遑寧處當務之急則綜理規畫罔辭疲數必欲遺佚來哲以延數世美

利且公無見費民無告煩不聲色而就緒非秉心
塞淵視國猶家者若是乎稽古博物發潛抒粹垂
之典訓括今古而彌綸之大義炳炳彰著匪特一
邑之故也指掌而著鑑存焉跡公爲政者弘之以
虛受體之以中孚乘時振輯勿致淪墜豈惟南宮
實賴之達之天下可也故曰學與政足觀矣志凡
五卷目計九篇其義例則自序詳焉予不贅及云
嘉靖己未仲秋之吉

賜進士四川布政使司右叅政前吏部考功司員
外郎白石山人劉汀撰

南宮縣志目錄

卷之一

地理第一

卷之二

建置第二

田賦第三

卷之三

祠祀第四

官師第五

卷之四

人物第六

選舉第七

雜物第八

卷之五

藝文第九

目錄

右志凡五卷沿革疆境山川里社風俗土產等物皆地理所具作地理第一城池公署坊場以保障曲防申命振德皆建置之事作建置第二有田則有賦有身則有役皆地之所供作田賦第三治民事神王政所重作祠祀第四禮樂刑政分職而治作官師第五尚友古人鄉



邦爲首作人物第六科貢制定俊髦繇興作選舉第七
祥異吉凶比類以附作雜物第八感物造器屬辭貞教
使後有述焉作文藝第九凡九篇

目錄終

目錄

二

南宮縣志卷之一

地理志第一

沿革

南宮夏禹貢冀州之域湯革夏命仍爲九州冀如夏周武王克商至成王封弟叔虞爲唐侯後改國號曰晉大山以東號爲東陽地春秋末爲趙簡子食邑賜扁鵲田四萬畝即此地也後三分晉地趙氏擅食邑遂盡有大原東陽之地秦吞六國列郡縣隸鉅鹿郡漢興始置爲南宮縣屬信都國新莽時改曰序下明帝改屬樂成國安帝延光初隸安平國曹魏取袁紹河北地皆因漢舊

南宮志一

屬冀州晉省後復置隸安平國後魏隸長樂郡北齊省隋文帝開皇六年復置屬冀州煬帝初屬信都郡唐初屬冀州武德四年析置昌亭縣玄宗天寶隸信都郡肅宗初復屬冀州五代皆因唐舊宋因後周仁宗皇佑四年廢六年置省堂陽新河縣入焉金元俱因宋舊大明高皇帝驅逐胡元疆理海宇編戶二十里文皇帝靖難都燕遂爲畿輔重地矣

疆境

東望武城南抵威平北接信都西連鉅鹿廣四十里袤一百二十里

形勝

大行控其西而紫荊龍泉倒馬井陘諸關在焉惠通帶其東而巨艦大艦烟檣風帆萬艘會焉密邇則衝漳流其前滹沱繞其後馬夾經其左大陸翼其右蓋四塞之區威武之國也

外史氏曰世代屢遷有沿革損益之說攷校郡邑名號幅員畧縮與今昔不同時耳至於疆次岳瀆萬古無異趙地川原廣大風物爽秀加以彊弓健馬雄於北方固名區也但密比雲中上谷漁陽遼東諸邊天下萬一有釁祭虜南關險阻不守大河以北皆胡騎屯聚之場矣彼形勝惡足爲恃也繕關隘修甲兵預儲蓄輯和其人民復秉固阨以臨之所爲控制畿甸貽萬世之安者其在是乎其在是乎

分野

天官書分野昴畢冀州晉封盡有全冀後韓趙魏三分晉國趙得趙地盡有晉之東疆則星分當在昴畢及攷昴畢二星常山入昴真定中山趙郡俱入畢信都入畢之三度南宮密邇信都亦當畢之三度矣

外史氏曰晉天文志畢星明大遠夷賓服色闇邊兵亂星盛中國盜竊發邊候警心動移兵大起若月星太白入

畢災異在趙地張衡輩言之詳矣雖國殊窟穴所應天變未可盡據然陰陽之精其本在地而上發于天者也懼災而寤反躬修政謝其咎繇則翫滅而福來天之所予也况所占皆夷狄邊警變在郡縣憂在朝廷豈細故哉傳曰天道遠人道邇察於三五之數仰觀時變與正事消息非先見於幾微者其孰能與於此乎

山川

紫微山在縣北五里平原廣野隱然突起爲一方勝槩形家曰此太行山脉自西北而來舊稱爲紫微山盖有所傳聞也○龍岡在舊縣南二里蜿蜒自西北來趙人

南宮志一

三一

建扁鵲廟于上又謂之鵲山太行之餘脉也居民除土漸平識者恨之○洚瀆一名虹江在廢縣南一云牛口峪以舊城爲卧牛故也金史云南宮有衡水舊瀆貫穿信都即此○濁漳河此彰德濁彰支流也貫南宮入冀州海子自青縣入於海○黃路河在縣治東南八十里禹所疏九河之馬頰也上通匏子口下達天津入海○飛鳳岡平地上岡阜逶迤軒然翔起形如飛翥即新城所占之地諺云舊縣卧牛新城飛鳳○古水潭在廢縣北衡水諸水匯積爲淵廣數里邑人常泛舟其中舉網得魚旋烹食之白文裕公有記

外史氏曰南宮地夷曠無高山大河故老稱涿瀆濁漳等下流必達信都今皆墳闕墾治作田水無所出既已湛溺舊城匯爲鴻隙大陂矣恒雨即平陸亦化爲巨浸南宮與冀州交困予嘗奉撫院檄文案圖書觀地形自高家庄孟村抵冀州王村左折新河窰上村東入鹽河一帶約計七十餘里皆順流卑陷故道依然尚存欲請於當路遣善爲策筭能度功用者摠其事令水工準高下索遺迹而穿之州民據目前畊耨未睹水執譁然爭持不能得此特論秋水羨漲小蓄萬一有非常大水至南宮溢溢必灌於冀州生民不爲魚鱉乎且一州一邑之巨害豈其與水爭咫尺之地哉

里甲

洪武初所置皆元末土著遺黎亦有鄰邑之人避亂徙居於此者謂之土民凡十四里在城社城市張家庄社縣北五里賈城社縣西三十里周家庄社縣西四十里唐蘇社縣西南十五里午及社縣東二十里丘村社縣東三十五里六方社縣東五十里慈達社縣東南四十里都水社縣東南五十里長樊社縣東南六十里小六社縣東南六十五里和生社縣東南七十里大城社縣東南八十里

永樂初四方之民流寓於此遂家焉謂之順民其稅有
糧無草以示優卹凡二里張馬社井村社其民便宜定
居故散在各社

永樂間雲雷初定榛莽彌望遷山西高平長子諸縣民
四百餘家聽其開墾荒地以爲永業是謂遷民凡四里
永豐社縣東五里永樂社縣東南十五里永安社縣東
十里永登社縣東南二十里

成化中生養蕃息新增六里嘉靖初以消耗復減二里
謂之新析民凡四里實爲二十四里云永昌社蘇村社
新安社李村社合諸社之民爲甲故散在各社

國朝制以十戶爲甲十甲爲里是爲一社里設一長十
年一役周而復始此聯屬人情均勞逸之法也成化弘
治間必里中有行義者衆共推爲長人亦以得與里長
爲榮今皆苦於誅求輒受箠笞榜械之辱微知自愛者
必百計祈解嗜利無耻之屬甘心應役科索戶人斯上
下交征之爲害厥有由也

外史氏曰予初管事南宮集父老庭中與語里甲供支
云故事縣官不量用度多寡揜于胥人熒惑之言籍口
舊規苛於督責夤緣爲奸漁獵下戶歲費緡錢數千予
曰此不可與樽節者何紛然其擾也乃爲之推筭經紀

約其所入稽其所出弛繁文以崇簡儉諸所嘗得已冗費頗減什之二三近奉本府申明禁例又裁去什之四五斯民始稍稍息有矣

風俗

南宮在冀州之域冀者伎也人性矜伎也亦兢直也其地皆白廣平非有山林藪澤之饒然當齊趙要衝四方輻湊故人皆纖嗇節儉射機利以自益丈夫力佃作給僮役女子拈針刺繡奇羨之家無千金之藏其貧弱亦無甚凍餒者縉紳先生必亢言厲志鑽研經史士以問學相尚家詩書而人逢掖間闔布衣敦實行辨是非猶

有先民之遺風焉迨其敝也事不軌於正義吏胥舞文弄法刀鋸在前莫知畏避富民出貸子錢月規什之一愚民絜息立敗其產其俗慄悍懷急貴勢上能遇忿爭輒以暴凌懦杖挺荷矜相搏擊間有犯禁群聚作奸至於蒙咎滅身而不悔者史稱冀州部盜賊常爲它郡劇乃自古記之矣大率鄙朴少文信巫尚鬼親亡好作佛事如暖伴送旌幡幢主人盛供張列歌妓歡洽醉飽而後發引墓壙無碑碣文字末年靡所紀載冠婚三加六禮廢缺不講嫁娶男女甚恣曠焉就簡易及時也近漸侈靡悚迫於耳目弃完堅務雕鏤以相耀公私告匱又

征役不息徃徃愁苦多去本就末以商賈負販爲利惟仁賢在上節而養之庶王教其可成乎

外史氏曰予讀班固循吏傳至文翁見蜀地僻陋有蠻夷風乃誘進張叔等併訓厲諸生大化蜀地未嘗不掩卷三歎也治天下類若此乎予獲任之初俗漸訛謾斯民溺其恒性休則競爲賭戲起則挾刃推剽案及所附離人彼直以爲是固然耳亦恬弗爲異蓋吏治稍緩民亦數輕易犯禁焉予辱教君子始選飭游徼禽巨猾知名者數十人悉瘦死獄中餘黨散落百姓僅得安枕是反覆勉諭之令各就本業民皆憬然自愛移其故習

上禮義重黨耻魯論曰斯民也三代之所以直道而行也宮邑之民豈即夫子所謂直道行者與吾有所試之矣

歲時土俗大畧

元日長幼夙興設脯糈果醴祀先畢稱觴爲尊長壽以次序拜已迺遍登親友門庭具酒食相賀召襍選往來數日始定○立春日以白葡萄爲細菜五辛爲春盤麪爲春餅謂之嘗春○元宵設脯糈果醴蒸黍麵爲小燈數百盞燃之中庭凡家之竈陴并白戶雷皆欄各置一盞市巷簫鼓喧填爲煙樹火花高吐數丈或各以意象作

談言隱語相猜射以供歡笑謂之燈謎遊人往來觀賞
至夜分不絕尤盛於弘治正德間乃今漸衰減矣○十
六日結伴遊寺觀耕字走馬鬪鷄蹴躑意錢日盱始散
謂之遣百病○清明男女皆插柳枝挈脯藉牲醴登先
隴祭畢藉草嚮餞庭院設鞦韆少女靚粧服競戲釵鈿
墮地莫知顧惜凡一月而罷○端午男女皆佩艾葉朱
符取艾枝插戶以辟五毒小兒以綵線繫臂謂之續命
以竹葉裹黍糯作粽亦名角黍親友交餽或延客謂之
解粽○七夕女子設瓜果醑脯祭織女天孫用盆水浮
針觀其所示之象以定女性工拙謂之乞巧○七月十

五携瓜果脯醴楮錢登丘隴祭奠持麻穀數莖掛諸隴
上謂之送麻穀○中秋親友以果肴月餅相餽遺月下
會聚飛觴呼盧至月影西流乃罷謂之翫月○重陽以
麩棗蒸糕謂之菊花糕以新黍釀酒謂之菊花酒親友
相餽遺出郭野飲謂之登高○十月一日携酒脯登丘
隴祭奠剪采紙爲衣裳焚之謂之送寒衣○臘月八日
以豆粟稻麥凡八種和羹粥食之謂之臘粥○二十四
日掃滌舍宇夜設酒脯祀竈薦以飴糖俗稱竈神是日
登天以家人罪過告于帝故以飴糊其口使不得言○
除日各隨家之貧富豫備酒肴果物以給新年之用門

外揭綵旛榜宜春及桃符門神以核不祥用椒柏葉和酒飲之燈燭熒煌竟夕不絕謂之守歲爆竹聲晝夜嚮震今以火炮代之謂之驚鬼

方物

穀多粟多黍多稷多粳多葛林芝麻有白麥有春麥有梁有稭有蕎

泉多木綿多絲多麻有蘇麻有絹多平機布有綿紬有烏帕

蔬圃生多芥多芹多葱韭茄蒜多菠多蘿蔔多胡蔔多芩多同蒿多高苣多黃瓜西瓜甜瓜菜瓜絲瓜冬瓜多

瓠多匏多白菜莧菜香菜有甘露有蔓菁有羊角豆龍瓜豆裙帶豆三生豆有藕野生有馬齒莧有落藜青薊曲曲菜錦錦菜有蒲公英地黃苗白花菜有苦買甘薺辣角

木家植有栢有松有竹多柳多槐多榆多椿多桑野植多白楊多青楊有荆棘有桐有楸有柘有棠棣有楮菓常食多棗多梨多桃多杏多李間食有柰有沙果有柿有榴有核桃櫻桃有葡萄有羊棗有文官果有杜梨藥桃仁杏仁樗相皮槐角子桑白皮地骨皮栢子仁枸杞子楮實子酸棗仁商陸天花粉瓜蒌仁蒲公英夏枯